

# Diemisi

## *Diemisiu Diue ataho hisaliale*

<sup>1</sup> Di ivilike Diemisi. Dau Dilava esemu. Isi nahie Kosive Iesu Keliso ke esemu daliko. Diue evievi ataeau vata bahatae umale la kebiahoike di levaleva ko hisaliamma. Lana duave.

## *Vaveve toela kemo negolahave.*

<sup>2</sup> Di haokuvuia, vaveve isute vadeu laemo lohoge momolelahai vahaeholahave. <sup>3</sup> Kosealemo la hilokage lana vaveve isute kemo dobuluvi-holisito kemo negolahage la evievi kena negoai ui tigei. <sup>4</sup> Iale lainaho vaveve isute ke kabebihavoi aehalive. Isito kemo negolahage la uveve kena dua vai inutolotoloai. <sup>5</sup> Iale la oleuoleu luleleholiale lana Dilava imihage auna lulele laovei. Kosealemo nahi Dilava imihage keu bae nahie imili ke kabebihavolivebene. Isito auna nahie isivi ke nahiovei. <sup>6</sup> Iale lainaho kemo dolodololahalive. Isito la Dilava imihaho valiege la uvu bahata mai avuemo mavoi imihave. Ata oleuoleu dolodololoai Dilava imihage imiliabe kena davalae vaveve nahate vai. Helukau utuai davalamo mamoge davalau veatai dobale ke nahate huhui-huhuiabeu abuialemo imiliabe keu bae inuta Dilavae talivebene. <sup>7</sup> Iale ata oleuoleu kateai dolodolomo Dilava imihage Dilavau bae isivibabe ke valivebene. <sup>8</sup> Ata kateale keau uvu abuiale ata ke nahate. Isi keau abu vadeu vamale kemo dolodolo unahama.

## *Kunaite isi kunaiholimale*

<sup>9</sup> Mesoho la degomoleau kunaiholimale ataea. Iale lainaho ke huhulahagelive. Isito vahaeholahave. Kosealemo Dilavau la tabagevenu. <sup>10</sup> Isege mesoho la degomoleau kunaitea. Isito lainaho ke huhulahagelive. Kosealemo vani mole la kunai keabuna valavalala nahate uoholisi. <sup>11</sup> Valavalala kena siaito vaniu hamage auna solekai tutukai dobai. Ige valeleve kena solekai uoholisi. Iale ke nahate kunaite keabuna abu lovi vasege vaveve toelana abuembo lohogeb abuna solekai kemo dobuluvisi. Katealemo lainaho la kunai uge mesoho uoholige ke huhulahagelive. Isito kemo vahaeholahave.

*Vaveve toelamo dobuluvi halevave.*

<sup>12</sup> Ata oleu vaveve toelamo dobaholisito au evievimo negoaniege auna vahaehoai. Kosealemo au evievimo negoale ke ibina Dilavana au louale ukolikolie hanogo mai omisi. Dilavau loui avoe, “Oleuoleu abu uvu mai daemo mavoliege dana ukolikoli mai kebia ovei.” <sup>13</sup> Iale vaveve toelau nahiemo lohogeb nahi hoto koseale lou halevai, “Dilavaike vaveve toela ke nahiho hanavonu.” Lainaho kateale loulive. Kosealemo vaveve toelau bae Dilava lobohavoi aiohavolivebene. Ige Dilavau bae atabe lobohavoi aiohavolivebene. <sup>14</sup> Isito atae biaeabuna vaveve toelaho isivilahai huhuilage kena kebia malevei aiogevei. <sup>15</sup> Ige huhuihuhuie toela kena kebiamo ulage abuna bae vaveve toela abu huhuimale ke vai. Ke vai tilata gabivela keabuna ibinave malei haluvisi. <sup>16</sup> Iale di uvue haokuvuia, lainaho kemo dolodololahagelive.

<sup>17</sup> Kosealemo otogomo vavevebe toelau lohoholinu. Isito Dilavau vaveve dua unaha nahiho

hanavoge nahi ke malema. Keu atagae umuka. Avuemo vavie vavevebeu uoholinu. Isito auna vani bahata atagae vaveve unaha vasei. <sup>18</sup> Nahi hotove seleve eviale kemoike Dilavau au isivimo nahi malevei isiviale au ese bahata kebiamo nahi eseve ovokina holievei.

*Dilava hoto evisi vaveve*

<sup>19</sup> Di uvue haokuvuia, di hoto ko evisi huhulahave. Lainaho solekai moleho itumulahai mole hotoe ibina vai moleho loulive. Isito vasohuta nenilahai hoto ke evie dua vaito bae moleho louve. <sup>20</sup> Dilavau isivialeike nahi vaveve inutolotolote unaha vai. Isito nahi itumulahaliege nahi bae kemo Dilava isivi ke valivebene. <sup>21</sup> Iale la huhuihuhuie toela huhulahai vaveve toela vamale ke halevave. Lainaho la ebia tabagevelive. Isito Dilavae lohoi Dilavau hoto mai la uvumo mamoale ke huhulahai vave. Ige la hoto ke evisi vamalemo Dilavana la malevei.

<sup>22</sup> Lainaho hoto ke evi unahalive. Lana katelahaliege la ebika lobogeveve. Isito hoto ke evisi au louale ke vave. <sup>23</sup> Ata oleu hoto ke evisito vaholieke keu ataeau evalimo abu ni elehage niabemo milou uge abu totolihi isiviholiale ke nahate. <sup>24</sup> Abu nimo ono vade uale ke elehaito halevai tai solekavesite momahavolu. <sup>25</sup> Isito ata olena Dilava menakae dua ke huhuai ehomage vaveve toelau bae ata ke malivebene. Ata kena vani bahata Dilava menaka ke momahavoholisito ke vase Dilavana vaveveve bahata hoesehavoi.

<sup>26</sup> Mesoho ata moleu huhuai kosea, “Dau eklesia ata.” Keu kateai louito au ai hoesehavoholige aivemo hotoe toelau lohomale kemo au ebika lobohavonu. Isi keu eklesia seleve holioholinu. <sup>27</sup> Isito Dilavau isiviale eklesia ata seleveau vaveve koseale vai. Kebiau golivu isi

gobuvu keau vatehani malemale kemo tedaevei hoesegevegei. Isi vatae vaveve toela aehai abu ebia hoesegevegei.

## 2

### *Nahi bahataeau Dilava nimo mole nahate*

<sup>1</sup> Di haokuvuia, laeau nahie Kosive Iesu Keliso ke ehovamale ataea. Dilavau ke ebagemage keu kosive baluga holinu. Iale lainaho kunaite ata kebia tabageveito kunaiholimale kebia tatolevelive. <sup>2-3</sup> Mesoho la guligulilahasege ata moleu linei dua vai ogoe dua hatuale keu ata moleu ogoe sisi vale keti lohogelainaho ogoe dua vale ke ebagevai avuho loui kosea, "Au ugulamomale dua kove ugulamo." Isi ogoe toela vale keho loui kosea, "Au uokeve laminela." O mesoho loui kosea, "Di veloe heie vata komo ugulamonela." Lainaho katalahalive. <sup>4</sup> Lana katalahaliege ata mole hoesehavoito ata mole aiohavove. La ata kebia uvu hilokaholisito hoto kateale louale kemo la uvu keu toelanu. <sup>5</sup> Di uvue haokuvuia, di hoto ko evive. Dilavau kunaiholimale kebia tabagevei isiviale abu abu evievimo negolahai elike olemeau Dilavaho isiviale keau au louale matamave doga keve tai. <sup>6</sup> Iale vadealemoike la kunaiholimale kebia aiogevema. La huhuige oleteabuike la aiogevei laemo kotalahama. Kunaiholimale keau kateholima. Isito kunaite keabuike kateale vama. <sup>7</sup> Ata keabulike Dilavau la hohavei Iesu ivie dua mai laoveale ke aiohavoma.

<sup>8</sup> Lana Dilava menaka mole ehovaliege vaveve dua vave. Bukae Hotomo menaka keu loui avoe, "La la ebikaho isiviae hoesegeveale ke nahate la haokuvuho isiviae kebia tedaeveve." <sup>9</sup> Isito lana

atae uvu hilokaholisito vaveveabe ke unaha ele-hai hoesegevei mesoho aiogevliege lana vaveve toela vai Dilava menaka ke eguvave. <sup>10</sup> Iale ata oleu Dilava menaka bahata vaito menaka igae egumale keu Dilava nimo menaka bahata bokoale nahate. <sup>11</sup> Dilavau menaka mole mamoi loui avoe, “Lainaho mole keatehi ladevegelive.” Isi tota loui avoe, “Lainaho mole havegelive.” Iale lana mole keatehi ladeveholisito mole haveliege kemo lana Dilava menaka eguvave. <sup>12</sup> Isito lana menakave ke ehovai la hoto la vaveve hoesegeve vaveve toelau bae la malevelivebene. Ige Dilavau au menakamo la vaveve kaovamale kela au bae laemo vavevebe toela elehalivebene. <sup>13</sup> Ata oleu ataho uvuholiale keho Dilavau bae uvualivebene. Isito ata oleu ataho uvuamale keu bae Dilavau atae vaveve kaovamale kela vabualivebene.

### *Evievimo vaveve dua vaveve*

<sup>14</sup> Di haokuvuia, mesoho ata moleu loui kosea, “Di di uvu mai Dilavamo mamonu.” Keu kateai louito vaveveve keu inutolotoloholinu. Iale la huhuige evievi ata kateale Dilavana mai. Ba, Dilavau bae ata kateale malivebene. <sup>15-16</sup> Iale di la haivege evive. Mesoho evievi ata degomoleau ogoholisi vaeta uale kebiaho lana loui kosea, “Dilavana la hoesegevei. Iale talive lovi isi ogoe dua vai uve.” Lana kateai abuho louito tedaevholige keu toelanu. <sup>17</sup> Evievi vaveve keu koseanu. Hoto loui vaveve vage keu duave. Isito hoto unaha loui ata tedaevholige evievi katealeu toelanu.

<sup>18</sup> Ige mesoho ata molena loui kosea, “Au evievite ata. Isege dau vaveve dua vamale ata.” Isito vaveve duana nahiemo uoholige

oleve kateige evievie vaveve kena nahiemo ui. Iale nahiabuna nahie evievi kemo vaveve dua vage keu duave. Katealemo ataeabuna nahie vavevemo hilokage nahiau evievie ata seleve. **19** La hilokage Dilava ke igaeu ua. Keta duave. Isito lainaho bae munanae toela vaveve ke nahate valive. Kosealemo kebiata hilokai vabulahage Dilava igaeu ua. Isito abu isivive ke vaholima. **20** La keau luleleholilu. Iale dana oleva kateai la haivege lana kemo lulelelahai hilokage ataeau evievi ata holisito vaveveva vaholige keu anekianu. **21** Di kemo hoto mole louge evive. Nahie umuka Ebalahamu keu oleva kateai Dilava nimo inutolotoloanu. Kosealemo keu au mo Aisiki hamaliho umuvai mai mune vitale ke golomo mamonus. Ige Dilavau vaveveva ke elehai hilokage keu evievi ata seleve. **22** Lana hilokaholilu. Ebalahamu vaveve isi evievive keu igae. Iale vaveveva keike evievive mai selevetinu. **23** Iale vaveveva keu Bukae Hoto mole mai selevetinu. Hoto keu loui avoe, “Ebalahamu au uvu mai Dilava ominu. Iale evievive kemoike Dilavau loui avoe, ‘Keu inutolotolote ata.’ Isi avuho loui avoe, ‘Au di haoka.’” **24** Iale lana di laheho louale kemo lulelelahalu. Ata oleuoleu evievi ata holisito au evievi kemo lovioholiale keau Dilava nimo inutolotoloholilu. Isito ata oleuoleu evievi ata holisi abu evievi kemo loviale keau Dilava nimo inutolotoloalau.

**25** Ige subuta teibae keate mole Leiabu keu ke nahate vanu. Keu evievi ata holisi vaveve dua vanu. Vaveveveu inutolotoloale keu koseanu. Iselala kosiveu ata hanavege abu Leiabu vatae lohoge keu kebia malevei au oe hogoeveniale bae hanavege abu humaha molela detuluvilu. **26** Di louale keu koseanu. Nahie munana kena

uoholige nahiabuna haluvisi. Iale ke nahate nahi evievi ata holisito evievi vaveve vaholige nahie evievi keu anekianu.

## 3

### *Nemee vaveve*

<sup>1</sup> Di haokuvuia, la moagaeau bae ata haiveveve lovi ke valivebene. Kosealemo la hilokage nahiabuna nenilahai ata haiveveve lovi ke vaholige Dilavana nahie vaveve kaovai nahiho hoto baluga loui. <sup>2</sup> Nahi bahata vaveve degomolemo dobuluvima. Isito ata oleuoleu abu hoto loumale kemo hotoe dua unaha loumale keabuna abu vaveve bahata hoesegegegei. <sup>3</sup> Di louale keu koseanu. Nahiabuna hote mai osie aimo umuwai ke butuhage osi kena au isivi halei nahie isivi vai. <sup>4</sup> Ige bouti vaveve keta ke nahate. Bouti keu baluga. Iale heluka balugana lohogé nahiabuna talie esehame ke matahai taliage bouti kena nahie isivi keve tai. <sup>5</sup> Ige nahie nemee vaveve keta ke nahate. Nahie neme keu esevehame. Isito keta nahiabuna hoto baluga loui nahie ebika tabagegegei. Vene keta huhulahave. Nahiabuna botoe tiliege vene esehame beige kemo matama bahatana lahai. <sup>6</sup> Iale nahie neme keu vene ke nahate. Neme kemo vaveve toela moagau ua. Iale kena nahie vava bahata aiohavoi. Kosealemo vaveveve keu veneu hodovavesite keve lohonu. Iale kemoike nahiabuna hotoe toela baluga loui nahie vaveve bahata aiohavoi. <sup>7</sup> Di tota hoto mole louge evive. Ataeabuna botoe ovo, ugu, ute, huena malei loholiege lovi ovei haivege abuna isiviabe vasegi. <sup>8-9</sup> Isito atabeu bae ke nahate neme ke haivulivebene. Neme kemo nahiabuna vaveve

toela baluga lougei. Nahi nahie neme kemo nahie Kosive Dilava ke hoesehavoito hoidevei kemo Dilavau au ebia nahate ata vaeveale kebiaho hotoe toela loui aiogevegei. <sup>10</sup> Nahi katelahai nahie nememo Dilava hoesehavoi ata aiogevege keu toelanu. Iale di haokuvuia, nahi vaveve kateale va halevai. <sup>11</sup> La hilokage e hana kemo e heteu bae e tumuteti mole tamoevei loholivebene. <sup>12</sup> Ige anani idi keu bae okali bai mamolivebene. Ige vulutu keu bae anani bai mamolivebene. Ige davala kemo e heteu bae loholivebene. Iale ke nahate nahie neme kela hotoe toela hotoe dua ke nahi lou halevagei. Isito hotoe dua unaha lougei.

### *Otogoe lulele*

<sup>13</sup> La lulele ata holiliege la ebika tabageve hal-evaito vaveve dua unaha vage ataeau la vaveve ke elehai hilokai kosea, “Lulelete ataeabulike kea.” <sup>14</sup> Isito mesoho lana mole maina mai isi moleho itumulahai la ebika unaha huhueveliege lainaho loui kosea, “Noeau luleletea.” Kosealemo la vaveve kemo ataeau hilokage laeau loboe ataea. <sup>15</sup> Lulele katealeu otogomo dobai loho-holinu. Isito keu vatae lulele unaha. Vaveve katealeu Dilava vaveve holioholinu. Isito keu munana toelae vaveveike. <sup>16</sup> Ataeau mole maina mai isi moleho itumulahai abu ebika tabageveale kemo abuna mole halevei abu isivi unaha vai vaveve toela baluga vagei. <sup>17</sup> Isito luleleu otogomo dobai lohoale ke vaveveu koseanu. Lulele kemo ataeabuna vaveve dua unaha vai moleho uvulahai moleho isivilahai mole hoesegvei mole tadaevegei. Lulele kemo ataeau bae mole lobo-gevei mole aiogevelivebene. <sup>18</sup> Iale oleuoleu

uvevete ata holiale keau uveve dua vai ata degomole hoesegevege ata kebia vavevena inutolotoloai.

## 4

### *Vatae vaveveho isivi halevave.*

<sup>1</sup> La vadeuhooke molehi ugologoloai moleho louma. Kosealemoike huhuihuie toela moagau la uvumo uale kemoike vavae isivi moagau la malevege la kebiaho isivilahai mole aio gevema. <sup>2</sup> La isivialeike la isivi ke malei. Isito la ke maleveve keu laemo anekianu. Kemoike la isiviale ata havei abuemo la isivi ke malei. Kateike la vai molehi ugologoloai moleho louma. La la isivi maleholiale keu koseanu. La la isivi maleveve keho Dilava imihaholima. <sup>3</sup> Mesoho la Dilava imihaito la isivi ke maleholilu. Kosealemo la imihale keu la isivi unaha. La isivialeike la ebikaho la isivi ke malei. <sup>4</sup> La vaveve keu teibae vaveve nahate. Keate moleu au kolia halei malaha moleti oimale ke nahate la Dilava halevaito vatae vaveve ke ehovama. Lana kate lahalioge oleve kateai Dilavaluvuta haokuvuai. Kateaveve keu anekianu. Kosealemo oleuoleu vatae vaveveho isiviale keau Dilava haokuvu holioholilu. Isito keau Dilava aiohavomale ataea.

<sup>5</sup> Lainaho Bukae Hoto mole ke huhulahai kosea, “Keu hoto unaha.” Bukae Hoto keu loui avoe, “Dilava Munanae Tumu nahie uvumo umale keu isivioholiale nahi vatae isivi valiho.” Hoto keu kateanu. <sup>6</sup> Ige Dilavau au uvu mai nahiovei nahi negotieveale keu baluga. Katealemoike Bukae Hotou loui avoe, “Ata oleuoleu abu ebika tabageveholiale kebia Dilavana au uvu ovei negotievei. Isito oleuoleu abu ebia tabageveale

kebia Dilavau bae au uvu ovei kebia negotievelivebene.” <sup>7</sup> Iale la isivi ke va halevaito Dilava isivi unaha vave. Ige Seteneu lae lohogelainaho isivive valive. Isito ke vavevemo la ebika bamuge auna la halevei tai. <sup>8</sup> Lana Dilavae lohogelainaho avuta lae tai. Laeau vaveve toela vamaleataea. Iale la vaveve toela ke halevave. Laeau uvu abuiamaleataea. Iale la uvu kebia hoesegevei uvu igaeave. <sup>9</sup> Lainaho vaveve toela vai avuemo vahaeholahai helahalive. Isito kemo uvulahai ninalahave. <sup>10</sup> Lainaho la isivi vai Dilava nimo la ebika tabagevelive. Isito Dilava isivi vase auna bae la tabagevei.

*Lainaho mole vaveve kaovai la ebia tabagevelive.*

<sup>11</sup> Di haokuvuia, lainaho moleho hotoe toela loui kemo mole aiogevelive. Ata oleuoleu kateai abu haokuvue vaveve kaovai abuho louale keau Dilava menaka tatolevei aiohavolu. Lana katelahai Dilava menaka kemo hoto loui aiogeveliege la keau Dilava menaka ehovaholisito menakave ke aiohavolu. <sup>12</sup> Dilava ke igaeike menaka mai nahiovei nahie vaveve nahiemokaovama. Iale kena au isivimo nahi malevei mesoho nahi aiogevei. Iale la oleve kateike vaime la haokuvu vaveve abuemo kaovai aiogevema.

<sup>13</sup> Di hoto mole laheho louge evive. La degomoleau loui kosea, “Noeabuna tiliege vagana igae o moleve ui lovi baluga vai kemo moni baluga malei.” <sup>14</sup> La katelahai louito nivue uveve ke la hilokaholilu. Goeu uito solekai uoholiale ke nahate la uveve kena nova uito nivu uoholisi. <sup>15</sup> La kateale louge keu toelanu. Isito la koseale louge duave. “Dilavau isiviage noeabuna uliege vaveve kateale vai, koseale vai.” La hoto kateale

louge duave. <sup>16</sup> Isito la hoto kateale louholisito la ebika malei hatuevei kemo hoto louma. La hoto kateale loumale keu toelanu. <sup>17</sup> Iale ata oleuoleu vaveve dua hilokaito vaholieale keau kemo vaveve toela valu.

## 5

### *Kunaitebiaho deiada*

<sup>1</sup> Kunaite ataea, di hoto louge evive. Vaveve toela balugau laemo lohovevelua ninalahai kekolahave. <sup>2</sup> Kosealemo la kunai keabuna toelai uoholisi. Ige la ogo keabuna sisilahai uoholisi. <sup>3</sup> Ige la golo isi la siliva keabuna taholahai toelai. La aike kunai moaga bevuevei otoveale kebiahi lana igaetoai vanie gabи kela venemo ladevei kemo vatehani baluga maleve. <sup>4</sup> La esemuiau la bulumo lovilahaito la kebia ibina oveholiale kemo lana abu kekolahamale evilu. Keau ninalahai kekolahage otogoe umale Kosive baluga keu kekoeabe ke evinu. <sup>5</sup> Vata kove la uveve keu ovo batate ke nahate. La kunai moaga malei hamubisi uveve dua vama. Isito abu ovo batate hamale ke nahate Dilavana bae la aiogevei. <sup>6</sup> Atae dua keau la aiogeveholisege la heiata kebia havema.

### *Kosiveu lohoveve ke hemei ui guligulilahave.*

<sup>7</sup> Di haokuvuia, lainaho kabebilahalive. Isito negolahai ulage Kosiveu lohoi. Bulumo lovia-male ke vaveve huhulahave. Kena vaeahamo au lovi haito kabebiholisi hemei usege vaganamo veniu lohogē lovive kena baie dua vai. <sup>8</sup> Iale ke nahate kabebi halevaito negolahai hemei uve. Kosealemo Kosiveu lohoveve vaniu vugu-vuguanu.

<sup>9</sup> Di haokuvuia, lainaho mole vaveve molemo lougelive. Lana vaveve kateale vaholige Dilavau bae la vaveve kaovalivebene. La vaveve kao-vaveve atau lohoveveu vuguvuguanu. <sup>10</sup> Di haokuvuia, belovetaeau subuta Kosive ivimo hoto louale kebia huhueveve. Beloyeta keau Dilava hoto loui kemo vatehani maleito kabebiholisi negolahai lovi ke vai timale nahate nahita vai. <sup>11</sup> Nahi hilokage keau vaveve kateale vale kemo Dilavau hoesegevenu. Ige la Diobu deiada keta evialeike. Diobu keu vatehani maleito kabebiholisi negoige Dilavau gabie avuho uvuai ke tedahonu. Nahi hilokage Dilava keu ataho uvuai tedaevemale Kosive.

<sup>12</sup> Di haokuvuia, hoto kebiamo hoto kou baluga. La isiviae hoto vadeu la haokuyuho louliho valiege lainaho Kosive ivi lougelive. Isi lainaho vatae kosive ivi louveei lougelive. Isito la valiho isivialiege loui kosea, “Ito, dana vai.” O la valoliho valiege loui kosea, “Ba, di bae valivebene.” Katealemo Dilavau bae la vaveve kaovalivebene.

<sup>13</sup> La vigomo atabena vatehani malema. Keho louge au guliguliai Dilava imihai. Isi la vigomo atabena vahaehoai ue dua vama. Keho louge au nogoli loui Dilava hoesehavoi. <sup>14</sup> Isi la vigomo atabena vavahanianu. Avuho louge au dubue eloda namigevege abu loholive avuho guligulilahai Dilava ivimo oele mai avuemo ehosivai. <sup>15</sup> Abuna lohoi katelahai abu uvu mai Kosivemo mavoi guligulilahage Kosivena ata ke tedahoge auna momoleai. Isi mesoho ata keu vaveve toela vage avuho guligulilahage Kosivena toelave ke ulihai. <sup>16</sup> Iale lana la vaveve toela ke daiai moleho loui guligulilahage Kosivena la hoesegevei. Ata inutolotolote kena guliguliage guligulive kena

vuvuneai. <sup>17</sup> Subuta beloveta mole Ilaidia keu nahi nahate. Iale keu negoai Dilava imihai isiviholialeike veniu vatae loholiho. Ige Dilavau imilive evisi vagana abuita igaeta isi bata sigisi ke uvumo veni hanavoholinu. <sup>18</sup> Iniale au tota Dilava imihage Dilavau otogomo veni hanavonu. Ige kemo vatae onobenobeau tota ulie dua valu.

<sup>19-20</sup> Di haokuvuia, di hoto mole louge evive. Mesoho la olena hoto seleve halei humaha toelala tiniege vaveve toela vage la molena hoto seleve loui ke haivuge kena tota hoilahai hoto seleve ehomage la hatihati humahamo ke malu. Ige Dilavana vaveveve toela bahata ulihage keu bae hatilivebene.

**Buka Tumute  
The New Testament in the Mountain Koiali Language  
of Papua New Guinea  
Nupela Testamen long tokples Maunten Koiali long  
Niugini**

copyright © 1981 Wycliffe Bible Translators, Inc.

Language: Mountain Koiali (Koiali, Mountain)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-26

---

PDF generated using Haiola and XeLaTeX on 11 Nov 2022 from source files  
dated 9 Oct 2020

db58c592-1903-54ff-a424-991321fd5949